

# Insul a.d. Ahr



**Hotel Ewerts** in 't centrum van **Insul**, met 'n terras aan de **rivier de Ahr**, baeter kins se 't neet treffe.

Met de minse van Rapido d'r beej had Insul dit wiekend inens 10% mier inwoëners want as idderein thoés is woeëne d'r maar 487 minse.

Det guf niks want wat klein is kin allein maar grutter waere en dao zien ze net mei begónne.

Want precies beej **Hotel Ewerts** veur de deur wuurt 'n rotonde aangelag.

Ik haop det d'r genóg auto's kómme um de rotonde in te rieje.

Enfin, we ware maar anderhalf oor van hoes, maar de umgaeving guf dich drek 'n vakantiegeveul en dao geit 't um. Met de pieke van de óetgespaarde benzine kóste we 'ne extra Schuss, halfum of roeëd wienke bestelle. Det is allemaol óetgedokterd door die jónge van Smeets, neet gek hé.

Ze hadde ouk 'n motto bedach: "**Geej zeet ze vlege**".

Ze kinnde bedinke waat ze wille..... .... weej weite waal baeter wae ze zuut vlege.

De verzöring waar prima beej **Ewerts**, elken aovend 'n 4-gange diner en nao 't sloope 'n good óntbijt.

De serveerster **Monica** kwam dan waal óet Vietnam maar werkde met Deutsche Gründligkeit.

Het zoog metein welke klant 't glaas laeg had en zórgde d'r veur det d'n umzet op piel bleef. Het deej tösse de bedrieve door de jónges efkes veur wie snel desse 2 iézerkes óet elkaar kins haole.

Wiek had d'r metein 'n vrindinke beej en brach zien eige goocheltruuks mei nao de bar um Monica te teste.

**Paus Franciscus** wis det Rapido nao Insul ging en had de dochter van zien jónge broor, **Schwester Fransisca met vrindin Johanna** ouk nao Insul gesteurd um de zaak 'n bietje in de gate te halde.

Ze hebbe met allerhande beeldjes, lempkes, theelichjes en geweid water geprobeerd um ós in 't gareel te halde.



D'r stond ouk 'n bekske für eine **Spende**, det zal waal veur de erme kiendjes zien in de missie.

We kregen op zóndaagmorge van de 2 nónne as dank veur alle Spendes 'n zelfgeknutseld printje naeve 't óntbijtbordje.

Erg attent van eur.

Maar ik betwiéfel of ze zelf de geloftes aafgelag hebbe die beej 'n kloëësterorde hure.

Ge weit waal: **de gelofte van gehoorzaamheid, van kuisheid en van ermood**

Elke morge en aovend zoote ze behuurlik te schranse aan 'n aparte taofel en

dachte det weej det neet in de gate hadde.

D'r stónde allerhande schienheilige attribute veur de aetborde um de aandacht aaf te leie

maar Rapidoleeje zien ouk neet van Lottum.



Ik kin mich neet veurstelle det **de Abdis** van eur kloëëster van dit óetstepke op de huuegte waar.

Um maar te zwiége van de **wien en die schüskes** die ze genuttig hebbe.....

2 jónge van Rapido zoge die **Begiene** waal zitte en elken aovend ware ze inens allebei verdwene en die nónne ouk.

As die Begiene nog maar kinne winne aan 't kloëësterlaeve noow ze 't echte laeve gepreuf hebbe!

Ik bin beniejd waat die 2 in **Roeëme** te vertelle hebbe aan **Ome Franciscus**.

Op zaoterdaag make we alzelaeve 'n **oriëntatietoch** van óngeviér 10 km.

Door de opdracht onderwaeges hebbe we waat um euver nao te dinke of um euver te näöle.

Deze kier meuste we 'n fotocollage ter plekke oplosse.

De vraog waar; "Van wae zien

de **achterkóp** op dit blaad",

daoreuver ware de meininge in ózze groep verdeild.

Meistal kieks se emes waal veur de kop maar neet d'rop.

Euver achterkante gespraoke; dao zien nog waal waat variaties op te verzinne veur de volgende kier.... det kin bes leuk waere.

Dan de opdracht; zoë snel meugelik 'n lempke laote brande op 'n paneel vol met stekkers en schakelaers.

Unne stekker met 'n langk en 'n kort pinke waar **'t ketje**, óet **Remund** kómme toch listige ideeje.

'N vliegtuugske van Tempex kins se met taegewind gen richting gaeve, maar dae handicap had iddere groep.



Laot det vliegtuugske noow ouk de 1e pries zien, de winnaers ware d'r erg bliej mei.

De **köskepel** had 't vurrig jaor op Rapidowiekend **ADV** gehad en daorum deeje ze dit jaor, zónder trompette trouwes, extra eur bes.

Ein van de stamkunde beej Ewerts vond de köskepel zoëë good det ze óetgenuedig woorte um op zóndaagmorge beej de inzaegening van de speultuin te kómme speule.

Maar good det Wiek haet toegezag want boete Rapido en waat motortoeuriste ware d'r weinig dörpsgenote die kwame kieke.

De pestoeër had ouk genne leuke buut, maar dao kin dae niks aan doon.

In zón klein dörp kins se neet dök oefene.



Op zaoterdaagaovend woorte d'r 'n paar spontane veurdrachte gedaon.

**Hannie en Nel** hadde verschil van meining euver 'n tas en 'n kenke kóffie.

Hannie zal intösse waal weite des se beej Axion of Xenos tig köpkjes kins kriege veur 'n prikske um lastige klante tevreeje te stelle.

In de **Horeca** mós se noow einmaol erg flexibel zien anders gaon de klante nao de buure.

**Jeanine** haet op zien ierste wiekend met Rapido 'ne actieve entree gemak

as **beschermingel Fransica same met aartsingel Michael (Jacq van E.)**

Het is noow behuurlik op de huuegte euver de stunts die de club de aafgeloupe jaore haet óetgehaold.

In 26 jaor tied zien d'r vuuel leuke dinger gebeurde en d'r ware hiel wat kwante anekdotes te vertelle.



**Ank** had 'ne dook gemak wao 'n haemd en 'n boks in geneijd

ware.

Carel, neet te verwarre met Cees, woort as slachoffer óetgezoch um de act mei óet te veure.

**Carel** meus zien hand in de bókspiepe staeke en det ware noow zien bein.

Hae kós zien hand daorum nimmer gebróeke en waar aan Gerda euvergeleverd det vanachter óet probeerde um Carel waat te aete of te drinke te gaeve.

Noow ik 't verhaol zoë opschrief kump 't waat vraemp euver maar wae d'r wat mier euver wilt weite

mót Ank maar efkes belle.

Waat is dae Carel 'ne gemakkelikke man, de kins d'r alle kante mei op, Regien haet toch maar gebóf.

Op zónaagmorge hebbe we beej **de speultuin** 'n klein half eurke op de pestoeër gewach.

De mis leep wat óet, det kin gebeure.

Intösse makde de persfotograaf 'n paar foto's veur 't dörpsblaad en meschiens waere die doorgesteurd nao 't E-3 journaal.

Intelik zoge we 'ne kleine optoch vanóet de kerk, met veurop de **plaatselikke**

**hermenie**, nao de speultuin kómme.

De kóskepel speulde 'n paar moeie stökskes en de persfotograaf makde nog 'n paar aktiefoto's .



Nao de inzaegening van de speultuin zien we met 16 man/vrouw nao **Altenahr** gereeje um 't wiekend aaf te slóete.

Wao kins se det baeter doon dan op 'n zónnig terras met **Kaffee und Kuchen**.

Beej **das Weisse Kreuz** aan de euverkant hebbe we jaore geleeje 'n wiekend doorgebracht.

Dao sprik 't dörp nog schand van det d'r Holländer ware die op straot de kleier met elkaar umruulde en dao in de ónderböks stónde.

Wao make die zich drök um, 't waar toch duuster en nao wat wienkes ouk nog mistig.

Ut waar weer 'n **alderwets gezellig** wiekend met lekker waer en 'n prima hotel.

Dao wille we nog waal ens truuk gaon, ge hoof de volgende kiér neet wiéd te zeuke.

Jónges alweer **bedank** veur de organisatie, tot de volgende kiér.

**Elly van Elswijk**

## Commentaren

Geweldig

door Guest op 24-04-2013 om 08:33

Asse dit gelaeze hebs kinse d,r allein maar van baale desse neet mei bis gegaon. Elly ein kolossaal compliment Veur dit fantastische verslaag,

Vollegende kier gaon weej weer mei,  
Groetjes,

Rob Doesborg

Komplimente!

door M.Floore op 29-04-2013 om 11:08

Elly, zoë als altiëd weer erg leuk gedaon! Lia